



# Tužilaštvo BiH



**\*isključivo za web, nije službeni dokument**

## **Biografija**

### **IZET ODOBAŠIĆ - TUŽILAC TUŽILAŠTVA BiH**

**Rođen je 24. 10. 1959. godine u Šturliću u općini Cazin, gdje je završio osnovnu školu i gimnaziju.**

**Zvanje diplomiranog pravnika stekao je nakon završenog studija na Pravnom fakultetu Univerziteta u Sarajevu, u periodu 1978. - 1982. godine.**

**Pripravnički staž je obavio u Regionalnoj bolnici Bihać i u Opštinskom sudu u Bihaću, nakon čega je do 1988. godine radio na poslovima šefa u Službi za opšte i pravne poslove u bihaćkoj bolnici, kada je imenovan na funkciju načelnika Službe za stručne i zajedničke poslove Skupštine opštine i Izvršnog odbora opštine Bihać. Za sekretara Općinskog sekretarijata za privredu, finansije, društvene djelatnosti i opću upravu, kao i za člana Izvršnog odbora općine Bihać je imenovan 1992. godine, koju funkciju je obavljao do 1995. godine.**

**U periodu od 1988. do 2001. godine je bio sekretar i član općinske Izborne komisije u Bihaću i član Udruženja izbornih zvaničnika Bosne i Hercegovine.**

**U Carinarnici Bihać, u periodu od 1995. do 2000. godine, radio je na poslovima zamjenika upravnika, što podrazumijeva poslove uspostavljanja i provođenja carinskog upravnog i prekršajnog postupka, poslove revizije i nadzora nad carinsko-upravnim procedurama i poslove instruktora - edukatora za početnu obuku carinskih službenika po programu Carinske službe FBiH i CAFAO-a.**

**U organizaciji Instituta za obrazovanje odraslih Kanade završio je školu menadžmenta po američko-kanadskom biheviorističkom metodu i teoriji uspjeha.**

**Pravosudni ispit je položio 1998. godine.**

**Za sudiju Kantonalnog suda za prekršaje u Bihaću je imenovan 2000. godine, a 2001. godine i za predsjednika tog Suda, koje poslove je obavljao do okončanja reforme prekršajne oblasti u Bosni i Hercegovini i uključivanja prekršajnog sudovanja u nadležnost tzv. redovnih sudova.**

**Tokom vršenja sudijske funkcije u prekršajnoj oblasti, angažiran je u periodu 2002. - 2006. godine kao član Visokog sudskog i tužilačkog vijeća BiH u Projektu reforme prekršajne oblasti u Bosni i Hercegovini, što je uključivalo i**



izradu novih zakonskih rješenja za prekršajni postupak i organizaciju vršenja sudske funkcije u toj oblasti.

Odlukom Visokog sudskog i tužilačkog vijeća BiH u septembru 2002. godine je imenovan za člana prvog saziva Upravnog odbora Centra za edukaciju sudija i tužilaca u Federaciji Bosne i Hercegovine, gdje je do kraja mandata 2006. godine, između ostalog, angažiran na razvoju programa početne obuke sudija i tužilaca, sudijskih i tužilačkih pripravnika i stručnih saradnika, a nakon početne obuke za edukatora Centra, i kao edukator u prekršajnoj oblasti, oblasti primjene Evropske konvencije o ljudskim pravima i osnovnim slobodama te ravnopravnosti spolova i zaštiti od nasilja u porodici. Za to vrijeme učestvovao je na više studijskih putovanja u vezi sa navedenim aktivnostima Centra, između ostalog, boravio je na pravosudnim akademijama Kraljevine Holandije i Republike Portugal.

U tom periodu je učestvovao u izradi početnih verzija Zakona o ravnopravnosti spolova, Zakona o zaštiti od nasilja u porodici (jedinstvena verzija za oba entiteta), Porodičnog zakona FBiH, Zakona o osnovama sigurnosti saobraćaja na putevima, Zakona o prekršajima (jedinstvena verzija za oba entiteta).

Aktivan je član Predsjedništva Udruženja sudija za prekršaje i Udruženja medijatora Bosne i Hercegovine, u okviru kojeg je obavio potrebnu obuku za zvanje medijatora u sudskoj oblasti.

Visoko sudsko i tužilačko vijeće Bosne i Hercegovine ga je imenovalo na funkciju kantonalnog tužioca u Kantonalnom tužilaštvu Unsko-sanskog kantona u oktobru 2008. godine, koju funkciju je obavljao do 01. 12. 2013. godine, kada je stupio na dužnost tužioca Tužilaštva Bosne i Hercegovine.

Pohađao je više domaćih i međunarodnih savjetovanja i seminara posvećenih sudskoj i tužilačkoj funkciji, oblasti carina i međunarodnoj trgovini, organizaciji i radu uprave i lokalne samouprave, upravnom postupku, izborima, popisu stanovništva, te radu i radnim odnosima.

Član je Udruženja tužilaca u Bosni i Hercegovini od 2010. godine.

/kraj/